

<http://www.ringhk.com/news2.php?id=6028>

網絡商搞免費電視 · 中移動香港推手機都睇到的「UTV」



近期免費電視風波搞到滿城風雨，但最估唔到的是，竟然連網絡商都有份參一腳。中國移動香港今日高調宣佈推出免費電視 UTV，內有 2 個免費台 6 個收費台。UTV 除咗可以用手機睇之外，上網睇、甚至用 CMMB 制式播放器經大氣電波睇都得，各位渴望有新電視台睇的手機用家，又有冇興趣呢？



▲ 中國移動香港由 CEO 李帆風親自主持 UTV 發佈會

 中國移動通信
CHINA MOBILE

全球首家應用DivX技術流動供應商



- 中國移動香港是全球首家在3G及4G網絡上應用DivX Plus Streaming技術的流動供應商
- Divx技術特點
 - 適應性串流 (Adaptive Streaming)
 - 動態調整解析度
 - 順暢隨時點播



▲ UTV 背後的技術，是由 rovi 開發的 DivX Plus Streaming，識得自動因應網絡質素調整解析度，確保順暢播放

iPhone 用家要等等、UTV 收睇三個方法



上文提及，UTV 主要經 3 個方法送到用家手上，分別有互聯網、大氣電波以及流動網絡，當中互聯網就最簡單，只要用瀏覽器登上 utvhk.com，就有得睇啦！

大氣電波方面，中移動香港就用 CMMB - 中國移動多媒體廣播制式作廣播，大家除了可以用中國移動香港推出的 專屬 CMMB 制式 PMP 播放器之外，當然亦可以自行北上在內地購買同樣支援 CMMB 制式的播放器，再向中國移動登記就用到。此外，中移動香港亦有計劃推出 UTV 手機，但就並非大家見慣見熟的 Android 智能手機，只是一部內置 CMMB 制式的 feature phone。



▲ 夥同 UTV 推出的，就有上圖這款設有天線的 CMMB 制式播放器



▲ 中國移動香港稍後會出這款 CMMB 手機，雖然也支援觸控操作，但就並非常見的

Android 機

當然，作為網絡商，中移動香港亦會為流動網絡用戶提供電視服務。現時大家已經可以用手上的 Android 手機，去 Google Play 下載 [UTV 程式](#)，用 3G/4G 或 Wi-Fi 直接收看。如果用家並非中國移動香港用戶，一樣有得睇！不過就要先登記帳戶，而且兩個免費頻道中只可以睇到中移動香港自家製作的「UOne」頻道(另一個免費頻道為 TVB 的互動新聞台)。

至於 iOS 用家，由於中移動香港指 iOS 版 UTV App 仍未上架，所以暫時都要用外置 CMMB 接收器頂住先，再等 UTV App 正式上架。



▲ 由於中移動的 iOS UTV App 仍在製作當中，想用 iPhone / iPad 睇 UTV，就要另購類似圖中的 CMMB 接收器喇！



▲ 現時唔少 Android 手機都支援 HDMI 輸出，用 UTV App 串流 720P 影片再駁返出電視睇都得

不過打算用手機睇的用家要注意啦，中移動香港指透過 UTV App，因為電視串流播放畫質達 720P，每秒已經會用到 1.2MB 數據用量，所以還是建議用 Wi-Fi 睇。另外如果用 CMMB 制式經大氣電波收睇，畫質就會降低僅得 320P (480 x 320)。

UTV 頻道內容、收費



服務組合	頻道名稱	售價
免費頻道#1	UOne 綜合頻道	免費
免費頻道#2	互動新聞台 (只限中國移動香港用戶觀看)	免費
UTV精選組合	美亞高清電影台 channel M 高清頻道 衛視中文台 國家地理野生高清頻道 Cartoon Network	每月港幣58元
個別收費頻道	MNC International	每月港幣58元

▲ UTV 各頻道收費

收費方面，現時 UTV 已經有兩個免費頻道，分別是中移動香港的「UOne」頻道，以及 TVB 的互動新聞台，另外只需多付每月 \$58，就可以睇埋：

- 美亞高清電影台
- channel M 高清頻道 - 以 Kpop 為主
- 衛視中文台 - 台灣綜藝節目為主
- 國家地理野生高清頻道
- Cartoon Network

另外中移動香港現有的「印尼台」MNC International，亦會繼續播放，不過就另外再收 \$58 月費。

講到頻道內容，中國移動香港強調自家製作的免費旗艦頻道 UOne，除了有慣常的影視娛樂、飲食、旅遊、潮流、科技節目之外，主打其實是名為「U shoot i shoot」的節目。節目賣點是觀眾自主，會播放觀眾投稿的自家製影片及「鮮浪潮」得獎作品，鍾意睇小品同支援本地創作的的朋友，唔好錯過啦！



▲ 中移動香港亦跟合作夥伴美亞請來關心妍、徐天佑和譚俊彥，親自執導微電影，在「u shoot i shoot」節目中播放

大家等咗好耐的新電視台，今次就以意想不到的方式登場，就咁睇似雖然自家內容欠奉，但就勝在收睇方法多元化，上網睇用手機平板睇都得，而且質素比 myTV 的低清畫質好得多，中移動香港話廣播由明日 12 月 11 日開始，大家又有冇興趣試睇呢？